

Pencarian MH370 sehingga 29 Mei

PUTRAJAYA: Kerajaan bersetuju untuk melanjutkan tempoh pencarian penerbangan MH370 sehingga 29 Mei ini, kata Menteri Pengangkutan, Anthony Loke Siew Fook.

Beliau berkata, ia dipersetujui kerajaan atas permintaan syarikat penerokaan dasar laut berpangkalan di Amerika Syarikat, Ocean Infinity Limited, yang bertanggungjawab melakukan operasi pencarian bangkai pesawat itu ketika ini.

“Keputusan Jemaah Menteri terdahulu melanjutkan pencarian sehingga 6 Mei lalu, memandangkan pencarian masih lagi negatif, minggu lalu, Ocean Infinity meminta Kerajaan Malaysia untuk melanjutkan pencarian hingga 29 Mei ini.

“Prinsip pembayaran kepada pencarian ini tetap berdasarkan terma No Cure, No Fee (tiada penemuan, tiada bayaran). "Kita harap ada perkembangan positif dalam seminggu ini, jika sebaliknya, keputusan sama ada ia akan diteruskan atau tidak akan ditentukan nanti," katanya pada sidang media di sini, semalam.

Beliau berkata, sehingga 6 Mei lalu, operasi pencarian Ocean Infinity Limited sudah merangkumi keluasan sehingga 76,000 kilometer (km) persegi lantai Lautan Hindi. “Ocean Infinity Limited sudah melengkapkan kawasan pencarian asal merangkumi keluasan 25,000 kilometer persegi, selebihnya adalah dipanggil kawasan pencarian tambahan yang dikehendaki syarikat berkenaan.

“Jadi apa yang dikehendaki Ocean Infinity Limited bagi lanjutan sehingga 29 Mei ini adalah untuk menghabiskan pencarian di kawasan seluas 7,000 km persegi lagi,” katanya.

Ditanya bila laporan penuh siasatan MH370 dapat dikeluarkan, Loke berkata, ia akan mengambil masa memandangkan proses pencarian dan siasatan masih berjalan. “Apa yang boleh saya katakan, kita komited untuk memberi laporan siasatan yang telus.

Laporan penuh akan diberikan kepada awam, tetapi masih tidak dapat dipastikan bila ia dapat dikeluarkan kerana siasatan masih berjalan. Setiap perincian siasatan akan kita siarkan secara terbuka kepada awam,” katanya.

Dalam pada itu, mengulas mengenai penetapan harga siling bagi tambang penerbangan domestik kendalian Suruhanjaya Penerbangan Malaysia (MAVCOM), katanya, beliau akan bertemu suruhanjaya itu dalam masa terdekat. “Buat masa ini belum ada sebarang perkembangan terkini, dan saya akan jumpa MAVCOM dalam masa terdekat.

Selain itu, dalam masa satu atau dua minggu ini, saya akan melakukan perjumpaan dengan semua agensi di bawah Kementerian Pengangkutan termasuk Jabatan Pengangkutan Jalan (JPJ),” katanya.